

PRIMERA CARTA DEL APOSTOL

SAN JUAN

JESUCRISTUQUI TII MUNTUQUIZ TJONCHIČHA

1 ¹ Wejrqui Jesucristuž puntul ančhucaquin cjižrčcuča ančhuc wali cuntintu cjisjapa. Tuqui timpuquiztanpacha Jesucristuqui žejlñipantakalčha, ima tii muntu želan. Tii muntuquiz tjontanaqui wejrnacqui Jesucristužtan kamchinčha; wejtnaca čhjučžtan nii cherchinčha; nižaza niiz taku nonzinčha. Jacatattanaqui wilta cherchinzakazza; nižaza wejtnaca kjaržtan nii lanzinčha. Jazimi tirapanž žejtčha Jesucristuqui. Nižaza jakziltat Jesucristuž taku criyačhaja jalla niiqui Yooztan wali cuntintupankaz cjequičha. ² Nii žeti tjaañi Jesucristuqui tjonchičha tii muntuquiz. Nekztan wejrnacqui nii pajchinčha, nižaza cherchinčha. Nekztan wejrnacqui nii Jesucristuž puntuquiztan žoñinacžquizimi, ančhucaquizimi paljaychinčha. Tuqui timpuquiztanpacha žejtñipantakalčha nii Jesucristuž puntuquiztan žoñinacžquizimi, kamñitakalčha. Nekztan tii muntuquiz tjonžcu, žoñi tucchičha. ³ Jaziqui nii chertanaca nii nonžtanaca ančhucaquin quint'učha, wejtnacatan ančhucatan tsjii kuzziz cjeyajo. Wejtnacatan

Yooz Ejpžtan nižaza Yooz Majchtan tsjii kuzzizpančha, jalla nižtapacha wejtnacatan ančhucatan cjisjapa.

⁴ Wejrqui tii cartal cjižrčcuča ančhucaquin wali cuntintu cjisjapa.

YOOZQUI ZUMA KJANQUIZ KAMČHA

⁵ Jesucristuqui wejtnacaquiz tjaajinchičha. Jaziqui nii tjaajintanaca ančhucaquin cjižrčcuča. Yoozqui zuma kjanquiz kamčha. Yoozqui zumapankazza, jalla nuž cjičha nii kjanquiz kamz puntuqui. Nižaza Yoozqui anapanž zumchiquiz kamčha. Yoozqui ana čhjul ujchizza, jalla nuž cjičha nii ana zumchiquiz kamz puntuqui. ⁶ Tsjii uj paañi žoñiqui zumchiquiz kamčha. Nuž kamcanaqui “Yooztan wejtanaqui tsjii kuzzizza”, cjičhaj niiqui, toscaraž chiičha nii žoñiqui. Anaž werar Yooz jiczquiz ojklayčha. ⁷ Yekjapazti kjanquiz kamčha; Yoozqui kjanquiz kamčha, jalla nižtapacha. Jakzilta žoñinacat nuž kamčhaj niiqui, Yoozquin criichinacžtan tsjii kuzzizza. Nuž kamcanaqui, tjapa niiz ujquiztan pertuntačha, Jesucristuž ticziž cjen.

⁸ Jakzilta žoñit “Ana ujchiztčha”, cjičhaj niiqui, persunpachaž incallčha; toscaraž chiičha. Ana zum kuzzizza nii

žoniui. ⁹ Pero jakzilta žoniit Yoozquin pertuna mayizaj niiui, niiz ujui pertuntaž cjequičha. Nižaza ana ujchiz cjequičha. Jalla nuž cjičha Yoozqui. Anaž wira toscara chiyasačha Yoozqui; niiz taku cumpliñipankazza. ¹⁰ Yoozqui cjičha, “Tjapa žoninacami ujchizza”. Jaziqui jakzilta žoniit “Ana ujchiztčha”, cjičhaj niiui, Yooz toscara chiitažokaž nayčha nii žoniui. Nižaza niiz kuzquiz Yooz taku anaž catokčha.

JESUCRISTUČHA UČHUM TJURT'IŽIŇIQUI

2 ¹ Wejt jilanaca, cullaquinaca, wejrui tii cartal cijrčučha, ančhuc ana uj paajo. Jakziltat uj paačhaj niiui, Jesucristužquiztan mayizaquičha. Niičha učhum tjurt'ižiniui. Nekztan Jesucristuui Yooz Ejpžquin mayizinaquičha. Jesucristuui ana čjul ujchizza, zumaž kamčha. Jaziqui nii tjurt'ižiniui zuma mayizinasachha. ² Učhumž uj paatiquiztan Yooz Ejpqui učhum casticz waquizičha. Jesucristuž ticzi nekztan Yooz Ejpqui učhum pertunasachha. Ana ujchiz Jesucristuui učhum laycu učumnaca ujquiztan ticzičha. Jaziqui Jesucristužquin tjapa kuztan cjenaui čjul uj paañi žoninacami pertunta panikaz cjesachha.

³ Jakzilta žoniit Yooz mantita jaru kamčhaj niiui, Yooz pajčha. Jalla niičha werarapan. ⁴ Jakzilta žoniit ana Yooz mantita jaru kamčhaj niiui, anaž chii atasachha “Yooz pajučha”, cjicanaui. “Yooz pajučha”, cjesaž niiui, toscaraž chiičha. Anazum kuzzizza nii žoniui. ⁵ Jakzilta žoniit Yooz tawk jaru kamčhaj niiui, Yooztan ancha zuma munaziñi kuzzizza. Yoozquin tjapa kuzzizpančha. Jilanaca, tii zuma cjuñzna. ⁶ Jakzilta žoniit “Yooztan tsjii kuzziztčha

wejrui”, cjičhaj niiui, zuma kamzpanž waquizičha, Jesucristuui zumaž kamčha, jalla niža.

EW MANTITA

⁷ Jilanaca, cullaquinaca, wejrui anal jazta mantita cijrčučha. Tuquitanpacha tii mantitac zizzinčhucčha ančhucui, porapat zuma munaziz, jalla nii. Tuquitanpacha tii mantitac nonzinčhucčha. ⁸ Pero tii mantita cijrčučha, jazta mantitažtakaz. Jesucristuui tii mantitacama kamčičha tii muntuquiz. Ančhuczakaz tii mantitacama kamčha. Nuž kamcan, zuma munazican, ana zumchiquiz kamčha, werar kjanquiz kamčha, Yooz takucama. Jalla nužupančha niiui.

⁹ Jakzilta žoniit “Kjanquiz kamučha”, cjičhaj niiui, jilanacžtan porapat zuma munaziz waquizičha. Jilanacžtan tira chjaawjkatčhaj niiui, pachpa zumchiquizpanž kamčha. ¹⁰ Jakzilta žoniit jilanacžtan porapat zuma munazaja, jalla niiui kjanquizpankaz kamčha. Jaziqui Yooz jicz cherchuchačha, ana ujquiz tjojtsjapa. ¹¹ Jakzilta žoniit jilanacžtan chjaawjkatčhaja jalla niiui zumchiquiz kamčha. Jakzitchuc ojkčhaj niiui, ana zizza. Jaziqui Yooz jicz ana cherchuchačha; zur žonižtakazza nii žoniui.

¹² Jilanaca, cullaquinaca, ančhucquin cijrčučha. Jesucristuž ticzi nekztan ančhuca uj pertunchičha Yoozqui. ¹³ Ejpnaca, ančhucquin cijrčučha. Jesucristuui tuui timpuquiztanpacha žejlñipantakalčha. Nii Jesucristužtan kamčha ančhucui. Tjotjowanaca, turtakanaca, ančhucui Satanás atipchinčhucčha. Jaziqui ančhucquinzakaz cijrčučha.

Jilanaca, cullaquinaca, ančhucui Yooz Ejpžtan kamčha. Jaziqui

ančhucaquinzakaz cjiŕŕcucha.
¹⁴Ejpnaca, Jesucristuqui tuqui
 timpuquiztanpacha željñipantakalča.
 Nii Jesucristužtan kamča ančhucui.
 Jaziqui ančhucaquin cjiŕŕcucha.
 Tjotjowanaca, turtakanaca, ančhuca
 kuzquiz Yooz taku chjojchiñčhucča.
 Nekztan Yoozquin tjurt'iñi kuzziz cjen,
 ančhucui Satanás atipchinčhucča.
 Jaziqui ančhucaquinzakaz cjiŕŕcucha.

¹⁵Tjappacha ančhucui, nonžna.
 Anača tii muntuquiz željñi
 cusasanacžquin kuz tjazqu. Anača
 anawali paaznacqiziqui kuz tjazqu.
 Jakzilta žoñit anawali paaznacqiz kuz
 tjaačhaj niiqui, anaž Yooz Ejpžquin
 kuz tjaača. ¹⁶Tii muntuquiziqui tižta
 anawali paaznaca željčha: persun
 kuzcama kamz pecznaca, persun
 čhjuquiz cherta pecznaca, tucquin
 cjis pecznaca. Jalla nižtanaca pecčhaj
 niiqui, diabluž jaru ojklayčha.
¹⁷Tii muntuquiz željñinacaqui liwj
 tucuzaquičha, tjažtaž cjequičha.
 Nižaza tii muntuquiz željñinaca
 pecznacami tucuzaquičha. Pero Yooz
 kuzcama ojklayñinacazti Yooztan
 wiñaya kamaquičha.

WERAR TAWKŽTAN, TOSCAR TAWKŽTAN

¹⁸Jilanaca, cullaquinaca, tii
 timpumiž ojtčha. Tsjii Jesucristuž
 quintraqui tjonaquičha, nii quinto
 zizza ančhucui. Nižaza anziq
 muzpa Cristuž quintra žoñinacaqui
 jecža. Nekztan učhumqui zizza tii
 timpuqui ojtčha. ¹⁹Nii quintranacaqui
 učhumquiztan zarakchičha. Anatača
 učhumtan tsjii kuzziz ninacaqui.
 Učhumtan tsjii kuzziz cjitasaž niiqui,
 tira učhumtan kamtasacha. Ninacaž
 zarakšanaqui, kjanapacha cjissičha,
 anatača učhum tsjii kuzziz ninacaqui.
²⁰Ančhuczi ana nižtičhucča.

Ančhuca kuzquizzti Yooz Espiritu
 Santo kamča. Jaziqui ančhucui tjapa
 werara zizzinčhucča. ²¹Werar taku
 zizñiž cjen ančhucaquin cjiŕŕcucha.
 Nižaza Yooz takuqui anaž čhjul
 toscarami chičha. ²²¿Ject toscar
 žoñejo? Jakziltat “Jesusača ana Yooziž
 cuchanžquita Cristuqui” cjičhaja,
 jalla ničha toscara chiñiqui. Cristuž
 quintračha ninacaqui. Nii žoñinacaqui
 Yooz Ejpžquin nižaza Yooz Majchquin
 ana pajz pecčha. ²³Jakziltat ana Yooz
 Majchquin pajz pecčhaja, jalla niiqui
 ana Yooz Ejpžtan kamasacha. Jakziltat
 “Jesucristuqui werar Yoozza” cjičhaja,
 jalla niiqui Yooz Majchtan kamča;
 Yooz Ejpžtan zakaz kamča.

²⁴Nii tuqui nonžta Yooz taku persun
 kuzquiz chjojwa ančhucui. Nii
 Yooz taku chjojžcu, Yooz Majchtan
 Yooz Ejpžtan ančhucatan tsjii kuzziz
 wiñaya kamaquičha. ²⁵Yooz Majchqui
 chiichičha, tuž cjian:

—Wiñaya Yooztan kamaquičha
 ančhucui.

²⁶Yekjap žoñinacaqui ančhuc
 incallz pecčha. Jaziqui cjiŕŕcucha
 nii puntuquiztan. ²⁷Jesucristuqui
 Yooz Espiritu Santo ančhuca kuzquiz
 cuchanžquichičha. Jalla nižtiquiztan
 nii Espiritu Santuqui ančhucaquiz
 tjaajinčha. Jaziqui yekja tjaažiñi
 espiritu anaž pecsa ančhucui. Yooz
 Espiritu Santuž chekan weraraqui
 tjaajinčha. Anaž toscananaca
 tjaajnasačha. Cristužtan tsjii kuzziz
 kama; jalla nuž tjaajinčha Espiritu
 Santuqui. Nižtaqui niž tjaažintacama
 kama.

²⁸Jilanaca, cullaquinaca, Cristužtan
 tsjii kuzziz kama ančhucui. Nekztan
 Cristuž tjontanaqui, učhumqui anaž
 eksnaquičha, nižaza anaž azaquičha.
²⁹Jesucristuqui zuma kuzzizpančha.
 Nii zizza ančhucui. Jakziltažlaj zuma

kuzziz niiqui, Yooz maatiċha. Jalla niżakaz zizza anċhucqui.

YOOZ MAATINACA

3 ¹Tjappacha anċhucqui nonżna. Yooz Ejpqui uċhum zumaż k'ayacht'iċha. Niżaza Yoozqui uċhum illziċha, niż maati cjisjapa. Yooz maatiċhumċha uċhumqui. Jalla niżtiquiztan uċhum kuzqui ana pajċha ana Yooz criichinacaqui. Yooz kuzmi anazaż pajċha ninacaqui. ²Jilanaca, cullaquinaca, uċhumqui Yooz maatiċhumċha. Wiruñauqui jaknużkaċhum cjissnaċhan, uċhumqui ana zizza. Pero Jesucristuż tjontanaqui, nii cheraquiċha uċhumqui. Nekztanaqui Jesucristuż irata cjisnaquiċha uċhumqui. Jalla nii tjaajinta zizzinċhumċha. ³Jakziltat Jesucristo tjewżaja, jalla niiqui ċjul uj paaznacami ecċha, ana ujchiz cjisjapa; Jesucristuqui ana ujchizza, jalla niżtapacha cjisjapa.

⁴Jakzilta žoniżlaj uj paañi, jalla niiqui Yooz mantitanaca anaż cazza. Uj paazqui Yooz taku quintracċha. ⁵Jesucristuqui tii muntuquiz tjonċiċha, žoinaċż uj pampatzjapa. Ana ċjul ujchizza niiqui. Jalla nii zizza anċhucqui. ⁶Jakzilta žoniżlaj Cristużtan tsjii kuzziz, jalla niiqui ana uj paañiċha. Uj paañi žoininacaqui anaż naaza Cristuż puntuquiztanauqui. Niżaza anaż kamċha Cristużtanami. ⁷Jilanaca, cullaquinaca, ana jecżquizimi incallskata anċhucqui. Wali kamñi žoininacaqui zuma kuzzizza, Cristużtakaz. ⁸Satanás cjita diabluqui tuqui timpuquiztanpacha uj paañipankaztakalċha. Jaziqui niżaza tira uj paañiċha. Nekztan uj paañi žoininacaqui Satanás diabluż maatinacaċha. Jesucristużt tii muntuquiz tjonċiċha, Satanás diabluż paatanaca akkatzjapa.

⁹Yooz maatiqui ana kuzin uj paañiċha. ċKjażtiquiztan nii ana kuzin uj paañitajo? Yooz maatiċha, nekztan kuztan ana uj paapaasaċha. Yooz Ejpż kuz cherchi kuzziz kamñiċha. Jalla nekztan tjapa kuztan uj ana paasaċha. ¹⁰ċJakziltat Yooz maatejo? ċJakziltat diabluż maatejo? ċJaknużża nii zizas uċhumjo? Jalla tuż zizasacċha. Jakziltażlaj kuzin uj paañi, jalla niiċha ana Yooz Ejpchizqui. Niżaza jakziltażlaj niż jilanacżtan ċhjaawjkatñi, jalla niiċha diabluż maatiqui.

PORAPAT ZUMA MUNAZIZA

¹¹Porapat zuma munaziza. Tii mantitaqui tuquitanpacha nonzinċhucċha. ¹²Tsjii žoñi želatċha, Caín cjita. Jalla nii Cainqui niż lajk conċiċha. ċKjażtiquiztan conċit nijo? Jalla niż paatanacaqui anawalinacataċha; niż lajkż paatanacazti walinacataċha. Jalla nekztan niż lajk conċiċha. Cainqui diabluż maatitaċha. Ana nii Cainż kuz cherchi kuzziz cjee anċhucqui.

¹³Jilanaca, cullaquinaca, tii muntuquiz žejlñi žoininacaż anċhuc ċhjaawjanaqui, ana istraña, ana upa kuzziz cjee. ¹⁴Tuquiqui ana zuma munazan, jalla nekztan infiernuquin okaj cjitatakalċha uċhumqui. Jaziqui Yoozquin criiżcuqui arajpach watjaż okaquiċha; wali cuntintu cjequiċha. Jalla nekztan uċhumqui Yoozquin criichi jilanacżtan porapat zuma munazizza. Nii zizza uċhumqui. Jakziltat ana jilanacżtan porapat zuma munaziċhaja, jalla niiqui infiernuquinż okaquiċha. ¹⁵Jakziltat niż jilżtan ċhjaawjkatċhaja, jalla niiqui žoñi conċiż cjes, jalla niżtaż ninacaqui. Niżaza žoñi conñinacami ana Yooz kuz cherchi kuzzizza. Anaż wiñaya

Yooztan kamasach̃a. ¹⁶ Cristuqui učum laycu ticzič̃ha. Nekztan jaknuž munazizlaja, jalla nii učumqui zizza. Učumqui Yooz criichi jilanacžtan zuma munazizpanč̃ha, ticzcama. ¹⁷ Tsji t̃japa cusasanacchiz žoñiqui tsjii t'akjir jila cheraquiž̃ niiqui, okzpanč̃ha. Anaž okznasaž̃ niiqui, č̃kjažt̃ Yooz cherchi kuzziz cjesajo? Anapanž̃ Yooz cherchi kuzzizza. ¹⁸ Jilanaca, cullaquinaca, anač̃ha atžtan taku mayaka okzqui. Paatanacžtanaqui okza. Nekz tjeeža učumž̃ okžtaqui. Niič̃ha werar okzqui.

YOOZQUIZTAN ANA PAYZNAKŽCU MAYAQUIČ̃HA

¹⁹ Jilanaca zuma okzc̃an, učumqui zizza, werar Yooz maatič̃humpanč̃ha, jalla nii. Nekztan llajlla kuzzizlaj̃ niiqui, t̃jup kuzziz cjee. Yooz yujcquiz̃ Yooz maatinacč̃humč̃ha.

²⁰ Yoozza juc'ant chekanaqui učum kuzquiztan cjenauqui. Yoozqui t̃japa učum kuz zizza, ana walinacami, walinacami, t̃jappacha. Nii anawalinaca zizcumi, Yoozqui tirakaž̃ učum okža. ²¹ Jilanaca, cullaquinaca, č̃hjulatorat učumž̃ kuz walika cječ̃haj̃ niiqui, Yoozquiztan ana ekscu mayasač̃ha. ²² Učumqui Yooz mantitacama kamtiqiztan, nižaza Yooz kuzcama kamtiqiztan učumž̃ mayiztac̃ nonžtaž̃ cjequič̃ha. ²³ Yooz mantitanacaqui tužuč̃ha: Yooz Majch Jesucristuž̃quin t̃japa kuztan cjee. Nekztanaqui jilanacžtan zuma munaza. Jalla nuž̃ mantichič̃ha Yoozqui. ²⁴ Jakziltat̃ nii mantitacama kamč̃haja, jalla niiqui Yooztan tsjii kuzzizza. Nižaza Yooztan tsjii kuzzizza nii žoñinacžtan. Yooz t̃jaata Espiritu Santuqui učum kuzquiz̃ žejlč̃ha. Jalla nekztan zizza učumqui, Yooztan učumtan tsjii kuzziz, jalla nii.

ESPIRITU SANTUŽTAN CRISTUŽ̃ QUINTRA ESPIRITUŽTAN

4 ¹ Jilanaca, cullaquinaca, nonžna. Jakziltat̃ “Tii takuqui Yooz takuč̃ha”, c̃jič̃haj̃ niiqui, nii žoñiž̃ chiita taku zumpacha tantiyaquič̃ha, Yooz taku chiiñi, ana Yooz taku chiiñi, jalla nii. Anač̃ha č̃hjul takumi p̃jazila criizqui. Tii muntuquiz̃ muzpa toscara chiiñi žoñinaca žejlč̃ha; Yooz taku chiitažokaž̃ c̃jič̃ha. ² ¿Jaknužt̃ žoñiž̃ chiita taku paji atas učumjo? ¿Yooz Espiritu Santuž̃ chiikat̃kaya? ¿Uz ana Yooz Espiritu Santuž̃ chiikat̃ja? Jalla tuž̃ paji atasach̃a učumqui. Tii muntuquiz̃ Jesucristuqui žoñž̃ curpuchiz̃ kamchič̃ha. Jakziltat̃ nižtapan chiič̃haja, jalla niič̃ha Yooz taku chiiñiqui. ³ Nižaza jakziltat̃ Jesucristuqui anač̃ha žoñž̃ curpuchiz̃ kamchiqui, c̃jican chiič̃haja, jalla niič̃ha ana Yooz takucama chiiñiqui. Cristuž̃ quintra espirotuqui nii chiikatč̃ha. Nii Cristuž̃ quintra espirotuqui t̃jonaquič̃ha; tuquitan anč̃hucqui jalla nii nonzinč̃hucč̃ha. Anziqui tii muntuquiz̃ nižta Cristuž̃ quintra chiiñinaca žejlč̃ha.

⁴ Pecta jilanaca, cullaquinaca, anč̃hucqui Yooz maatinacč̃hucč̃ha. Nii toscar taku joojooñinacaqui diabluž̃ mantitaž̃ ojklayč̃ha. Anč̃huczi Yooz Espiritu Santuž̃ mantitaž̃ ojklayč̃ha. Yooz Espiritu Santuqui juc'anti azzizza nii diabluž̃quiztan cjenauqui. Nekztan anč̃hucqui nii toscar taku joojooñinaca atipasač̃ha. ⁵ Ninacaqui diabluž̃ maatinacač̃ha. Nii žoñinacaqui ana Yooz takucama chiiñič̃ha, diabluž̃ taku chiiñič̃ha ninacaqui. Nii diabluqui tii muntuquiz̃ anchaž̃ mantič̃ha. Jaziqui Yoozquin ana criichi žoñinacaqui diabluž̃ taku criič̃ha. ⁶ Učumzti Yooz maatinacč̃humč̃ha. Jaziqui werar

Yooz takuž chiyan Yoozquin criichi
 žoñinacaqui nii werar takuž catokĕha.
 Ana Yoozquin criichi žoñinacaqui nii
 werar taku anaž catokĕha. Nužquiz
 werar taku chiiñi žoñinacami, nižaza
 toscar taku chiiñi žoñinacami
 pizcpacha pajasacha uĕhumqui.

YOOZQUI ANCHA MUNAZIÑI KUZZIZZA

⁷Pecta jilanaca, cullaquinaca,
 Yoozpankazza uĕhum porapat
 zuma munazkatñiqui. Jaziqui
 uĕhumqui tjappacha porapat zuma
 munazizpanĕha. Jakziltat zuma
 munaziĕhaja jalla niiqui Yooz maatiĕha.
 Nižaza Yooz pajĕha. ⁸Yoozqui
 ancha munaziñi kuzzizza. Jaziqui
 jakziltat ana munaziñi kuzzizlaja,
 jalla niiqui ana Yooz pajĕha. ⁹Yooz
 Ejpqui tii muntuquiz niž zinta Majch
 cuchanžquichiĕha uĕhum Yooztan
 wiñaya kamzjapa, wali cuntintu. Jalla
 nuž cuchanžquitiquiztan Yoozqui
 uĕhumquiz niž munaziñi kuz tjeeziĕha.
¹⁰Yoozqui ultimu zuma munaziñi
 kuzzizpanĕha. Yooz Ejpĕha uĕhum
 k'ayachichiqui. Nekztan niž Majch
 cuchanžquichiĕha. Yooz Majchqui
 uĕhum uj laycu ticziĕha, uĕhum
 ana casticta cjisjapa. Nekztan zuma
 munaziñi kuzqui jaknužt cjeĕhaja, nii
 zizza uĕhumqui.

¹¹Pecta jilanaca, cullaquinaca,
 uĕhumtan ancha munaziĕha Yooz
 Ejpqui. Jaziqui uĕhum nižtazakaz
 porapat zuma munazizpanĕha. ¹²Anaž
 jakzilta žoñimi Yooz cherĕha. Ana
 Yooz cheržcumi zuma munaziĕhaja,
 jalla nii žoñiqui Yooztan tsjii kuzzizza.
 Nižaza Yooz munaziñi kuz, jalla nižta
 kuzzizza nii žoñiqui. ¹³Yooz Ejpqui niž
 Espiritu Santo uĕhumquiz tjaachiĕha.
 Jalla nekztan Yooztan uĕhumtan tsjii
 kuzzizza, nii zizza uĕhumqui. ¹⁴Yooz

Ejpqui niž Majch cuchanžquichiĕha
 žoñinaca liwriizjapa. Nii Yooz Majch
 cherchinĕha wejrnaquui. Nekztan
 anĕhacaquiz nii puntu tjaajinchinĕha.
¹⁵Jakziltat “Yooz Majchĕha
 Jesucristuqui”, cjiĕhaja, jalla niiĕha
 Yooztan tsjii kuzzizqui. Nižaza Yoozqui
 nižtan tsjii kuzzizza.

¹⁶Yoozqui uĕhumtan ancha
 munaziĕha, jalla nii zizza uĕhumqui.
 Nižaza nii criiĕha uĕhumqui. Yoozqui
 munaziñi kuzzizza. Jaziqui jakziltat
 munaziñi kuzzizpanžlaja, jalla niiĕha
 Yooztan tsjii kuzzizqui. Nižaza Yoozqui
 ninacžtan tsjii kuzzizza. ¹⁷Nuž kamcan
 juc'ant juc'ant munaziñi kuzziz cjissa
 uĕhumqui, Jesucristuž irat kuzziz
 cjiscama. Jalla nekztan juyzuquiz ana
 eksnaquiĕha uĕhumqui. ¹⁸Munaziñi
 kuzziz žoñinacaqui ana Yoozquin
 eksniĕha. Zuma munaziñi kuzziz
 žoñinacaqui anaž ĕjulumi eksnasaĕha.
 Jalziltat eksni kuzzizlaja, jalla niiqui
 Yooz casticz eksa. Jalla nižtiquiztan
 anaž zuma munaziñi kuzzizza nii eksni
 žoñinacaqui.

¹⁹Yoozqui uĕhumtan zuma
 munaziĕha. Jalla nekztanaquui
 uĕhumqui Yooztan munaziĕha.
²⁰Jakziltat “Wejrqui Yooztan zuma
 munaziñi kuzziztĕha”, chiiĕhaja,
 jalla niiqui niž jilanacžtan ana
 chjaawjkatñipanĕha. Niiž jilanacžtan
 chjaawjkatĕhaja, jalla niiqui anaž
 Yooztan zuma munaziñi kuzzizza.
 Inapankaz “Wejrqui Yooztan zuma
 munaziñi kuzziztĕha” cjiĕha. Toscara
 chiiĕha. Nii žoñinacaqui cherta
 jilanacžtan anazuma munaziĕhaja,
 jalla niiqui ĕjaknužt ana Yooz cheržcu
 Yooztan munaziñi kuzziz cjesajo?
 Anapanž cjesaĕha. ²¹Yoozqui uĕhum
 mantichiĕha tuž cjan:

—Jakziltat Yooztan munaziñi
 kuzzizlaja, jalla niiqui niž

jilanacžtanami zuma munaziñi
kuzzizzakaz cjis waquiziča.

UČHUMQUI ANAWALINACA ATIPČHA

5 ¹Jesusača Yooziž cuchanžquita
Cristuqui. Jakziltat nii
Jesucristužquin criičhaja, jalla
niičha Yooz maatiqi. Tjapa Yooz
maatinacami Yooz Ejpžtan munaziñi
kuzzizza. Nižaza Yooz Ejpžtan
munaziñi kuzzizalaj niiqui, Yooz Ejpž
maatinacžtan munaziñi kuzzizzakazza.
²Nižaza jakziltat Yooztan munaziñi
kuzzizalaja, jalla niiqui Yooz
mantitanacaž cazza. Jalla nekztan
Yooz maatinacaqui porapat zumaž
munaziča. Niiž zizza učhumqui.
³Yooztan munaziñi kuzziz žoñiqui
Yooz mantitanaca cazza. Nii Yooz
mantitanacaqui anača ch'ama. ⁴Yooz
mantita cazcu, Yooz maatinacaqui
anawalinaca atipčha. Jakzilta žoñit
Yoozquin tjapa kuz criičhaja, jalla
niiqui anawalinaca atipčha. ⁵¿Jakziltat
anawalinaca atipjo? Jakziltažlaj Jesús
cjita Yooz Majchquin tjapa kuztan,
jalla ninacaž atipčha anawalinacaqui.

YOOZ MAJCHČHA JESUCRISTUQUI

⁶Jesucristuqui tii muntuquiz tjontan,
kjaztan bautistatača. Jalla nekztan
cruzquiz ch'awcta ticziča. Kjaztan
bautistaž cjen, jalla niičha tisticuqui,
Yooz Majchčha Jesucristuqui, cjican.
Cruzquiz ch'awcta ljoc tjawkchiča.
Jalla nii zakazza tisticuqui, Yooz
Majchčha Jesucristuqui, cjican. Yooz
Espíritu Santuqui tisticuzakazza: Yooz
Majchčha Jesucristuqui, cjican. Nii
Espíritu Santučha werarapan chiñiqui.
⁷Arajpaquinaqui čjep tisticunaca
žejlčha, Yooz Ejp, nižaza Taku cjita
tjuuchiz Yooz Majch, nižaza Yooz
Espíritu Santo. Nii čjepultanaqui

tsjiikaz chiičha. ⁸Nižaza tii
muntuquiziqi čjep tisticunacazakaz
žejlčha, Yooz Espíritu Santo, nižaza
kjaztan bautis, nižaza cruzquiz ljoc
tjawkz. Nii čjepqui tsjiikaz chiičha:
Jesucristučha Yooz Majchqui, cjican.
⁹Žoñž taku weraražlaja niiqui, Yooz
taku juc'ant werarača. Werara chiiñi
Yooz Ejpqui chiičha, tuž cjican:

—Jesucristučha Wejt Majchqui.

¹⁰Jakziltat Yooz Majchquin criičhaja,
jalla niiqui persun kuzquiz zizza,
Jesucristučha Yooz Majchqui, nii. Jalla
niizakaz Yooz Ejpqui chiičha. Jakziltat
Yooz taku ana criičhaja, jalla niiqui
Yooz toscara chiitažokaz nayčha. Yooz
takuqi chiičha: Jesucristučha Yooz
Majchqui, cjicanaqui. Jalla nii anaž
criiz pecčha yekjap žoñinacaqui. Jalla
nekztan Yooz toscara chiitažokaz
nayčha nii ana criiñinacaqui. ¹¹Nižaza
Yoozqui cjičha:

—Wejt Majchqui ančhuca ujquiztan
ticziča. Jalla nekztan ančhucqui
wejtan wiñaya kamaquičha, wali
cuntintu.

¹²Jakziltat Yooz Majchtan tsjii kuzziz
kamčhaja, jalla niiqui Yooztan wiñaya
kamaquičha. Nižaza jakziltat Yooz
Majchtan ana tsjii kuzziz kamčhaja,
jalla niiqui Yooztan ana wiñaya
kamasacha.

ŽERZ TAKUNACA

¹³Ančhucqui Yooz Majchquin criičha
tjapa kuztan. Jalla nekztan Yooztan
wiñaya kamaquičha, wali cuntintu. Nii
zizjapa, ančhucaquin cjižrčučha wejrqui.

¹⁴⁻¹⁵Učhumqui Yooz kuzcama
mayizaquiz niiqui, nonžtaž cjequičha.
Učhumž mayizta nonžtaž cjequiz
niiqui, tjaaataž cjequičha. Jalla
nužupančha. Weraraž niiqui.

¹⁶⁻¹⁷Tjapa anawalinacami ujpānčha.
Tsjii jilaqui uj paaquiz niiqui,

Yoozquiztan mayizinspanča, pertunta cjeejo. Pero tsjii juc'ant anawal uj paaz kuzzizzalaj niiqui anaž pertunta cjesača. Niižta ana Yoozquiztan mayizina, pertunta cjeejuqui. Yekja ujnacami Yoozquiztan mayizinasacha, pertuntaž cjejajo.

¹⁸Yooz maatinacami anaž kuzin uj paasača. Yooz maatinaca walja kjaraz cuitiča Yooz Majchqui. Nii anawal Satanás diabluqui Yooz maati Yooz kjarquiztan ana kjañi atča. Nii zuma zizza ančhucqui.

¹⁹Yooz maatinacčhumča učhumqui.

Ana Yoozquin criichi žoñinacaqui, tjappacha Satanás diabluz mantuquiz žejlča. Učhumqui nii zakaz zizza.

²⁰Yooz Majchqui tjonchiča učhumnaca zuma intintazkatajo, nižaza werar Yooz pajajo. ¿Ject werar Yoozjo? Jalla niiča Jesucristo Yooz Majchqui. Jaziqui učhumqui nii werar Yooztan tsjii kuzziz cjissinčhumča.

Niižtan kamcan, wiñaya niižtan kamaquiča. ²¹Jilanaca, cullaquinaca, ančhucqui žoñiž paata yooznacquiztan zaraka, ana iya nekz macjata ančhucqui. Jalla nužupanča.